



## **Կարգապահական գործ թիվ ԿԳ-17101**

Հայաստանի Հանրապետության փաստաբանների պալատի խորհրդի  
2017 թվականի դեկտեմբերի 5-ի թիվ 180-րդ ԿԳ նիստի

### **Ո Ր Ո Շ ՈՒ Մ ԹԻՎ ԿԳ/108-Ա**

#### **ՓԱՍՏԱԲԱՆ ԱՐՇԱԼՈՒՅՍ ԽՈՂԻԿՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՅՈՒ ՔՆՆԱՐԿԵԼՈՒ ՄԱՍԻՆ (ԱՆԴԱՄԱՎՃԱՐԻ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ խորհուրդ**), նիստը նախագահող՝ Մելանյա Առուստամյանի, խորհրդի անդամներ՝ Կարապետ Աղաջանյանի, Սիմոն Բաբայանի, Տիգրան Խուրշուդյանի, Նելլի Հարությունյանի, Կարեն Մեժլումյանի, Տարոն Սիմոնյանի

քարտուղարությամբ՝ Նոննա Համբարձումյանի,  
քննության առնելով փաստաբան Արշալույս Խողիկյանին (արտոնագիր թիվ 341) կարգապահական պատասխանատվության ենթարկելու վերաբերյալ հարցը,

### **Պ Ա Ր Ձ Ե Ց՝**

#### **1. Կարգապահական վարույթ հարուցելու առիթը և հիմքը.**

Համաձայն ՀՀ փաստաբանների պալատի գլխավոր հաշվապահի կողմից ՀՀ փաստաբանների պալատի նախագահի առաջին տեղակալին 07.09.2017թ. տրամադրված տեղեկանքի փաստաբան Արշալույս Խողիկյանն ունի 10.000 (տասը հազար) ՀՀ դրամ գումարի չափով անդամավճարի մուծման չկատարված պարտավորություն՝ 2017թ. հունիսից հուլիս (ներառյալ) ամիսների համար: Համաձայն տեղեկանքի փաստաբանի անդամավճարի ընդհանուր պարտքը կազմում է 195.000 (մեկ հարյուր ինսունհինգ հազար) ՀՀ դրամ՝ հաշվարկված 2014թ. մայիսից մինչև 2017թ. հուլիս (ներառյալ) ամիսների համար:

#### **2. Կարգապահական վարույթ հարուցելու մասին որոշումը.**

07.09.2017թ ՀՀ փաստաբանների պալատի նախագահի առաջին տեղակալի

թիվ 275-Ա/ԿԳ-17101 որոշմամբ կարգապահական վարույթ է հարուցվել փաստաբան Արշալույս Խողիկյանի նկատմամբ՝ «Փաստաբանության մասին» ՀՀ օրենքի 17-րդ հոդվածի 4-րդ մասի, 19-րդ հոդվածի 1-ին մասի 5-րդ կետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ՝ Կանոնագիրք**) 2.9.1 ենթակետի խախտման հատկանիշներով:

11.09.2017թ-ին կարգապահական գործը հանձնվել է Պալատի խորհրդի անդամ Մելանյա Առուստամյանի (նիստը նախագահող):

11.09.2017թ-ին գործը ընդունվել է վարույթ և նիստի օր է նշանակվել 05.12.2017թ-ին, ժամը 18:29-ին:

### **3. Պատասխանողի համառոտ բացատրությունները.**

Փաստաբան Արշալույս Խողիկյանը թեև պատշաճ ծանուցվել էր կարգապահական նիստի վայրի և ժամի մասին, սակայն Խորհրդին անհայտ պատճառներով նիստին չէր ներկայացել:

### **4. Գործի հանգամանքները՝ առկա ապացույցների վկայակոչմամբ.**

Պալատի խորհուրդն, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) փաստաբան Արշալույս Խողիկյանը փաստաբանական գործունեության արտոնագիր է ստացել 16.03.1999թ. (հաստատվում է Պալատի ընդհանուր դեպարտամենտի ղեկավարի կողմից 05.12.2017թ. տրամադրված տեղեկանքով),

2) փաստաբան Արշալույս Խողիկյանը ունի 10.000 (տասը հազար) ՀՀ դրամ գումարի չափով անդամավճարի մուծման չկատարված պարտավորություն՝ 2017թ. հունիսից հուլիս (ներառյալ) ամիսների համար (հաստատվում է Պալատի գլխավոր հաշվապահի կողմից 07.09.2017թ. ՀՀ փաստաբանների պալատի նախագահի առաջին տեղակալին տրամադրված տեղեկանքով),

3) փաստաբան Արշալույս Խողիկյանը իր անդամավճարի պարտքը չի մարել (հաստատվում է Պալատի գլխավոր հաշվապահի կողմից 05.12.2017թ. Խորհրդին տրամադրված տեղեկանքով):

### **5. Պատասխանողի անձը բնութագրող հանգամանքները.**

Պալատի ընդհանուր դեպարտամենտի ղեկավարի կողմից 22.08.2017թ. տրամադրված տեղեկանքի համաձայն Արշալույս Խողիկյանի (արտոնագիր 341, ստացված՝ 16.03.1999թ.) նկատմամբ 2006-2017թթ. ընկած ժամանակահատվածում 7 անգամ հարուցվել է կարգապահական վարույթ(6 ավարտված և 1 ընթացիկ վարույթ) անդամավճարի պարտք ունենալու մասով: 28.09.2015թ. թիվ ԿԳ/110-Ա որոշմամբ Արշալույս Խողիկյանն անդամավճար վճարելու պարտականությունը չկատարելու համար ենթարկվել է

պատասխանատվության նկատողության, իսկ 16.10.2015թ. ԿԳ/150-Ա որոշմամբ՝ խիստ նկատողության ձևով: 03.03.2016թ. թիվ ԿԳ/49-Ա որոշմամբ անդամավճար վճարելու պարտականությունը չկատարելու համար Արշալույս Խողիկյանն ենթարկվել է պատասխանատվության տուգանքի ձևով՝ 10.000 ՀՀ դրամի չափով, իսկ 06.10.2016թ թիվ ԿԳ/120-Ա որոշմամբ ենթարկվել է պատասխանատվության տուգանքի ձևով՝ 20.000 ՀՀ դրամի չափով: 04.04.2017թ թիվ ԿԳ/38-Ա որոշմամբ ենթարկվել է պատասխանատվության տուգանքի ձևով՝ 25.000 ՀՀ դրամի չափով, 22.08.2017թ. թիվ ԿԳ/78-Ա որոշմամբ Արաշալույս Խողիկյանը ենթարկվել է կարգապահական պատասխանատվության տուգանքի ձևով՝ 30.000 դրամ չափով:

## **6. Պալատի խորհրդի պատճառաբանված եզրակացությունը և որոշումը.**

*Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Արշալույս Խողիկյանին պետք է ենթարկել կարգապահական պատասխանատվության, հետևյալ պատճառաբանությամբ.*

«Փաստաբանության մասին» ՀՀ օրենքի 17-րդ հոդվածի 4-րդ մասի համաձայն՝ Փաստաբանը փաստաբանների պալատի սահմանած չափով և կարգով մուծում է անդամավճար՝ փաստաբանների պալատի ընդհանուր պահանջների և փաստաբանական գործունեության իրականացման հետ կապված այլ ծախսերի համար: Նույն օրենքի 19-րդ հոդվածի 1-ին մասի 5-րդ կետի համաձայն՝ փաստաբանը պարտավոր է մուծել անդամավճարներ:

Համաձայն Կանոնագրքի 2.9.1. կետի՝ Փաստաբանը պարտավոր է սահմանված կարգով և չափով Պալատին վճարել անդամավճար:

Համաձայն ՀՀ փաստաբանների պալատի խորհրդի 26.12.2013թ.-ին թիվ 33/6-Լ որոշմամբ ընդունված «Անդամավճարների, մուտքի և այլ վճարների վճարումների վերաբերյալ» կարգի (այսուհետև Կարգ) 7-րդ կետի՝ Փաստաբանները յուրաքանչյուր ամսվա համար անդամավճարների վճարումը կատարում են հաշվետու ամսվան հաջորդող ամսվա մինչև տասնհինգը, իսկ նույն Կարգի 21-րդ կետով սահմանվում է՝ Ամենամսյա վճար վճարելու պարտականությունը խախտելու համար փաստաբանը կամ օգնականը ենթակա են կարգապահական պատասխանատվության:

Վերոնշյալ նորմերի վերլուծությունից հետևում է, որ սահմանված ժամկետներում անդամավճար չվճարելու համար փաստաբանն ենթակա է պատասխանատվության:

Փաստաբան Արշալույս Խողիկյանը խախտել է վերը նշված նորմերի պահանջները, որն ապացուցվում է գործում առկա՝ ՀՀ փաստաբանների պալատի գլխավոր հաշվապահի կողմից տրամադրված տեղեկանքներով: Ավելին, կարգապահական վարույթ հարուցելուց հետո էլ նա շարունակել է խախտել վերը նշված նորմերի պահանջները և կարգապահական վարույթը խորհրդում լսվելու ժամանակ էլ վերը նշված խախտումն առկա էր: Խորհուրդը կարգապահական տույժ

նշանակելիս հաշվի է առնում նաև, որ սույն որոշումը կայացնելու դրությամբ փաստաբանը նախկինում նմանատիպ խախտման համար ենթարկվել է կարգապահական տույժի:

Ելնելով վերոշարադրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7. հոդվածի 5-րդ մասի 1-ին կետի, 39.9. հոդվածի 1-ին մասի 4-րդ կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, «Փաստաբանի նկատմամբ կարգապահական վարույթի իրականացման» կարգի 30-րդ հոդվածի 5-րդ մասի 1-ին կետի պահանջներով Խորհուրդը՝

## **Ո Ր Ո Շ Ե Ց**

**1. Փաստաբան Արշալույս Խողիկյանին (արտոնագիր թիվ 341) ճանաչել մեղավոր «Փաստաբանության մասին» ՀՀ օրենքի 17-րդ հոդվածի 4-րդ մասի, 19-րդ հոդվածի 1-ին մասի 5-րդ կետի և Փաստաբանի վարքագծի կանոնագրքի 2.9.1. ենթակետի պահանջների խախտման համար:**

**2. Փաստաբան Արշալույս Խողիկյանի (արտոնագիր թիվ 341) նկատմամբ կիրառել կարգապահական տույժ՝ տուգանք 35.000 ՀՀ դրամի չափով:**

**3. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Արշալույս Խողիկյանին:**

**Ծանոթություն.** *Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:*

ՀՀ փաստաբանների պալատի խորհրդի  
կարգապահական գործով  
նիստը նախագահող՝

Մելանյա Առուստամյան